



US Tir Donald Trump-i sangküm
India semdangtsüa akok

Professional football nungi
taruba kum anisüngzüksü akok



Tzükong asemsangeri Mangkolemba "District" jenjang meshir

Mangkolemba, 07 November (TYO): Tzükong asem-Jangpetkong, Japukong aser Tzürangkong-i tentetba District Demand Committee, Mangkolemba (DDCM)-i tanü 7th November, 2025 nü Mangkolemba town hall nung public rally ka ayongzüka aka.

Ibai tongtibangsa Mangkolemba tang koba Mokokchung district kübok Sub-Division ka lir, ibaji "District" jenjang ajungketjang ta akangba lokti sentong ka liasü.

Tanü iba lokti sentong nung Jangpetkong, Japukong aser Tzürangkong kübok yimtsüng ajak nungi nütsüng nübu kaketshir densema lenla tabensa nungi adenshia chittipak balala nung temeten/yimym o balala zülua bener shilem agia liasü.

Sentong temer külen, lokti külemi yimdong süa o Nagaland Chief Minister, Dr. Neiphiu Rio dangi Mangkolemba ya "District" jenjang ajungketjang ta taoba mapang 24th October, 2017 & 15th October, 2020 nung züluba chitti tanaben nenshiba ka Mangkolemba Addl. Deputy Commissioner, Moakümzüik Tzüdir nem DDCM Convenor, C. Onen Wallingi amoktsüogo.

Iba chitti nungji tzükong asem sangeri Mangkolemba ya District jenjang kechiba meshir ta asüba onük balala zülua lir.

Tanü iba sentong nung DDCM Convenor, C. Onen Walling-i jembidang, iba luden ya 2013 küm tenzüik, aser 24th October, 2017 anogo, Nagaland Chief Minister, T.R. Zeliang ajurua Mangkolemba Sub-Division ya District jenjang ajungketjang ta takangba chitti ka agütsüba nungi state Sarkar den



iba dak sentakba nung tongtepratepa maparen tenzüikba tatalokba otsü tatongi metetdaksü.

Mangkolemba District jenjang meshiba dak sentakba oten nung 15th October, 2020 anogo, tanaben chitti ka Nagaland Chief Minister, Dr. Neiphiu Rio nem DDCM Convenor aser Tzükong asem Tir-i sign sür agütsü. Kasa iba dak sentakba maparen nung 03-09-2021 anogo Ao Senden dang Non-Objection-Certificate meshia Tzükong asem Tir aser DDCM, Convenor-i tezüluba nung agütsüba ama, Ao Senden-i 24-01-2022 anogo NOC temelabaji zülü nung agütsü, ta paisa ashi.

Iba dak sentakba nung asen tzükong asem sanger yimtsüng ajak nung yimsüsü anir sensosanger ajaki aser bendang lima nung alir sensosangertem ajaki yangi asenok ajak shilem lir ta angateta, wadang takok angutsü nükla nung nüngdak ajak nung nungita yaritsü ayongzüiker, ta DDCM convenor-isa metetdaksü.

Nagaland nung tzükong asem Head Quarter Mangkolemba Sub-Division ya tejentiba aser tulutiba lir, anungji, "iba sub-

division nungi District jenjangi ajungketjang ta Nagaland Sarkar dang akangba ya tim tangutsü talang ka meshir, aser iba takangba ya state Sarkar anema masü aser Naga kin mesüra lokti tentet shinga anema masü", ta DDCM co-convenor, N. Nungsang Lkr-i sentong nung nübur ola aser yimym shilem agidang metetdaksü.

Anungji, "ochi shisatsü aser tangatetba tajung aliba senso tajungtemi kecha arendaka mebilemi yaritsü Ao kin aser Naga kin ajak dang mepishia ayimoktsür" ta paisa mepishia metetdaksü.

"State sarkar tokolakba Nagaland CM, Dr. Nephieu Rio-i anir par Minister-tem aser MLA-tem, Chief Secretary-i anir Sarkar ketdangsür ajak dang sub-division Mangkolemba ya "District" jenjangi ajungketjang ta temepishiba ola tzükong asem tenüng nung nübur ola Nagaland sarkar dang yimym ayimoktsür", ta pai metetdaksü.

"Tzükong asem sanger kümükümshia putu yimsüsü

kübok tashi anga-a aser Tsüngrem akümtsüba Pai agütsüba taküm, mapang, rongsen, sempet, shisatsü aser nübu agi tenlatepa iba tongpang takok mangu tashi tali tashi taitba nung noktaksi", ta paisa DDCM tenüng nung tzükong asem sanger ajak dang ayimoktsü.

Iba sentong nung M. Moa Hoki (Tzürangkong)-i tayongzüikba o tulu bener arua tesenteper ayongzüik. "Kechiba Mangkolemba 'Sub-Division' nungi 'District' jenjangi ajungkettsü nüngdaker?" ta asüba onük nung Tongpangtemsü (Jangpetkong), Imdongtangba (Japukong) aser Mangkolemba Watsü Telen Tir, Akala Walling par asemi telangzüba kuli balala bener arua lemsatep.

"Lanur Ola" ta sür Takotemsü (Mangkolemba Ao Lanur Telongjem nungi), Rosang Pongen (Jangpetkong nungi) aser Angemangyang (Japukong nungi) parnokia olen tajung aika bener arua ayongzüik.

All Ward Chairman

Mangkolemba, T. Longri Longkumer-i melepzüng o lemsatep. Iba sentong nung Sungtiaküm menden liasü. Mangkolemba Town Baptist Arago Assoc. Pastor, Toshi Tzüdir den temoatsü meshia sarasademer sentong tenzüik aser Ex. Pastor, Rev. Mar den tenünsang agüja sarasademer sentong tembang.

Mokokchung District Administration kübok Circle Office Mangkolemba Sub-Division ya 1961 küm Jangpetkong (mezüngbo Changkikong liasü) aser Japukong range na ayimjema yimsü asütsü asoshi tentet.

Iba sülen iba 1967, 1980, 1991 küm EAC, SDO (Civil) aser ADC Hq. ta jenjang tajungba küma ajungket. Ano, Mangkolemba Sub-Division indang administrative jurisdiction kübok Tzürangkong range züngsemtsüba ajanga Sub-Division ulushia aküm.

Tang ano tensa den apet kechisarena nung alima den sakuku jangyu medema aotsü aser tarutsü nübur jenjang tajungba asoshi tzükong asem senteper tentetba DDCM-i Mangkolemba Sub-Division ya District jenjangi ajungketjang ta state sarkar dang akanger.

Iba dak sentakba nung DDCM-i tanüa Nagaland CM, Dr. Neiphiu Rio dangi maneni nenshiba chitti zülüogo aser iba nungji parnoki kechiba District jenjang meshir ta asüba kuli tejangja shia lir.

Nagaland Police recruitment atema temelenshi sangdonger

Dimapur, November 7, 2025 (TYO): Nagaland Police-i taoba sangdong agütsüba nung Dimapur, Chümoukedima aser Niuland district asoshi constable (GD) mapa 144 lezmüksü aser Nagaland nung lisopur kin ajak asoshi "open competition category" kübok dendakja liasü saka iba ya state sorkari tanaben meyipa reprangshiogo.

Dimapur, Chümoukedima aser Niuland district tem atema mapa 144 lezmüksüba taoba Dimapur District alidang Indigenous Naga Tribes of Nagaland atema 2011 census Data nung ajemdaker Tribal Ratio alitsü ta Director General of Police, Kohima-i sangdong ka nung metetdaksü.

Temalen shia aliba temelenshi ya Nagaland Police Recruitment Portal nung enoksemogo aser Dimapur/Chumoukedima/Nuiland district tem atema tenüng agüja alir candidates-i nüngdak adokra November 8, 2025 nungi re-apply asütsü akok ta DGP Nagaland office ajanga sangdong ka nung metetdaksüogo.

Candidate temi pa/la registered mobile number nungi re-apply asütsü akok aser iba sülen revised admit card ka angutsü ta parnokisa ashi.

Maneni, online application forms agütsütsü atema closing date November 8, 2025 nungi anogo 15 November 22, 2025 tashi atsülangar ta DGP Nagaland office ajanga metetdaksü.

NPP Nagaland-i Forensic Infrastructure renloktsü akhanger

Dimapur, November 7, 2025 (TYO): Nagaland nung forensic infrastructure peria maliba atema tebilemtsü abener ta National People's Party (NPP) Nagaland-i metetdaksüogo.

Kohima aser tanga district tem nung forensic laboratories maliba ajanga bushisüngdangba maparen nung tetsükdaksü ajurur aser osang anguba nung menur. Iba ajanga mapang shitak nung temeten magütsüteter ta NPP-i ashi.

Tawa Kohima nung nisung ka tepsetba aser ozüng alema inyakba tatalokbatem nung bushisüngdangertemi Dimapur nungi forensic unit arutsü ata. Talisa, traffic timtem, lenmang majungba aser anentsüh aluba khuretttem ajanga mapang shitak nung tonga marutettsüsa akümer ta Media & IPR Cell, NPP Nagaland-i sangdong ka nung ashi.

Sorkari forensic facilities tashi itdaksütsü tebilemba lir ta

Deputy Chief Minister & Home & Border Affairs in-charge Minister Y. Patton-i ashiba atema pelar ta parnokisa ashi.

State Forensic Science Laboratory, Dimapur nung infrastructure, nübo aser technical facilities peria meliaka mapa tajung inyaka aruba atema tenünsang agütsür. Iba lab nung staff-i police aser investigative agencies bendanga agüja yaritepa aruba atema tenünsang agütsür ta NPP-isa metetdaksü.

Ajisüaka State Forensic Science Laboratory, Dimapur ya tajungba küma ajungkettsü nüngdaker. Iba laboratory nung tang advanced forensic tools, specialized divisions, aser trained personnel peria mali ta parnokisa ashi.

Nagaland sorkari Kohima aser tongtipang district tem nung Regional Forensic Laboratories lapoktsüla aser State Forensic Science Laboratory, Dimapur tajungba kümdaksütsüla ta NPP-

i takhangba agütsü.

Dimapur laboratory nung DNA testing, cyber & digital forensics, toxicology, aser ballistic divisions amenoktsüla aser iba den infrastructure and logistics nüngdakba alitsüla ta NPP-isa takhangba agütsüogo.

Sorkari qualified forensic experts anioktsüla aser police personnel o investigators asoshi training programs maneni agitsüla. Maneni police, prosecution, judiciary, aser forensic department tem tsüngda amalitep tajungba alitsü atema inyaksüla ta parnokisa sshi.

State sorkari forensic science budget balaka lezmüksütsüla aser forensic development ya criminal justice policies nung tongtipang mapa ka ta züngoktsüla. Maneni sorkari sensotem nem meteta lidaksütsü atema awareness aser sensitization programs agitsüla ta Media & IPR Cell sangdong nungsa metetdaksüogo.

Mokokchung Lotha Students' Union Hon Jubilee benjungmong among



Mokokchung nung Lotha Students' Union Hon Jubilee benjungmong sentong nung tongti tesemdanger Elias T Lotha Transport Commissioner-i jembidang aser Clark Theological College nung azüngertemi temeja ken ka atendang tangokba noksa.

Mokokchung Yimpoksüi/November 07(TYO) : Mokokchung Lotha Students' Union tenteter kümzüng 50 ajungba Hon Jubilee benjungmong sentong Mokokchung Town Hall nung kanga dang takok ngua mongogo.

Jubilee sentong nung tongti tesemdanger Elias T Lotha Transport Commissioner-i jembidang kaketshir aser shisashirtemi shisatsü bushiang aser aji bener pei sasep asoshi dang bener malitsüla saka meteta alibaji lemsatepang aser ibaji ajanga dang pei nüburtem tejakleni aoba nung shilem tulu agir asütsüta ashi.

Tongti tesemdanger-isa Lotha nungeri Aotsür agiba aika lira no Aori Lotha-tsür agiba aika lir, iba ama kibalenbuba ajanga kin tsüngda tesendaktep

akar aser iba den külemi iba ajanga Naga lima kin o kin tsüngda putepa alitsü lenmang sadema lapoktsür ta lemsatep.

Sentong nungsa "Golden Past, Intelligent Future" ta asüba omen nung ajemdaker District Institute of Education & Training(DIET) Tuensang Principal Peter Libenthung-i jembidang taoba tsürabur aser teti nung mapangtemji hon ama lir, kechiaser parnoki mapa tajungtem inyaka toktsüba ajanga asenoki iba nungji ajemdaker mapatong ajak inyaker, saka par putu aser tang lanu asensortem putu ya khenyongi balaka asünung shisashirtem kanga dang shisa kaa alitsüla. Tangar menepa tasoshia alitsü aser taküm jenjang temjena renemtetsü asoshi shisashirtem kanga dang chirapera alitsüla ta adenshia

aliba shisashirtem ajungshia jembia.

Jubileemong nüngtem nung Lotha Baptist Arogo Mokokchung Pastor Rev. W. Khonimo Odyuo-i shisashirtem atema Tsüngrem dang temoatsü meshia sarasadem. Lotha-tsür Lotha nunger Clark Theological College nung azüngertemi temeja ken ka aten aser Ao Kaketshir Mungdang Tir Sb. Lanutoshi Aier-i tayongzüka o jembiba den lenir balalai shilem balala agia liasü.

Mokokchung town nung tang Lotha nung kibong 120 lir aser kaketshir 142 lir.

Iba jubilee sentong temli dang ano Lotha nung nungtoko benjong Tokhö Emong sentong yar tsüngsangtepa, sobaliba ken tentepa agia liasü.

BJP Nagaland-i Vande Mataram kum 150 ajungba amung

Dimapur, Yimpoksüi/Nov. 07 (TYO): Bharatiya Janata Party (BJP) Nagaland ajanga Vande Mataram kum 150 ajungba bilemteta BJP Dimapur District Office nung sentong ka agia liasü.

Co-Convenor, Vande Mataram aser Nagaland State BJP Mahila Morcha tir Tsachola Rothrong-i iba anogomung teratet jembidang, Bankim Chandra Chattopadhyay-i Vande Mataram ya 1875 kum mejema liasü ta ashi.

India nung nuchiso meshiba mapang iba ken ya lungjemdaktsüba tashi aser nübur ajungmesoba indang lai lemsatepa liasü.

Rothrong-i nübur ajanga dang telungjem, yimya tajung aser linük tenzüka ajanga Vande Mataram indang tanüla agi süngdaktsüsü ayongzüka

liasü.

Iba ken nungya arok tashi, sobaliba maitsü, aser India nung ajunga dak bendanga agütsür linük tenzüka aser meimba mulungsentsü aliba sayur, ta lai ashi.

Laisa lanurtem dang item yimya wazüka ayutsü aser linük yangerba nung shilem agitsü ayongzüka liasü.

Sentong nung Maibam Sanjit, Vice President, BJP Dimapur District menden liasü, Sentile Tep-i sarasadem aser iba sülen Om Prakash Gupta, President, OBC Morcha, Dimapur District ajanga pela agizüka o jembia liasü.

Sentong nung Mamta Karir-i Vande Mataram ken ya aten, Pradip Barman-i melepzüng o jembia aser Azatoli H. Zhimo-i sentong tembanga sarasadema liasü.

Kohima Science College nung workshop ayongzüksü

Dimapur, Yimpoksüi/Nov. 07 (TYO): Department of Statistics & IQAC, Kohima Science College Autonomous, Jotsoma, Kohima ajanga sangdong ka nung, department-i November 10-12, 2025 anogotem 'National workshop on introduction to SPSS Interface and Data Handling Practice' ayongzüksü aser Department of Higher Education, Government of Nagaland ajanga sponsor asütsü, ta ashi.

Tesayur, research scholars aser kaketshirtem dang 'statistical data handling and analysis' atema SPSS software amshiba practical sayutsü.

Iba workshop nung shisalen sayur ya Dr. Sulaxana Bharali, Dr. Karuna Gogoi, aSer Dr. Arnab Narayan Patowary nungertem alitsü, aser parnoki statistics aser data analysis dak sendakba onüktem nung jembitsü, ta sangdong ajangasa ashi.

SCTE Kohima Hon Jubilee mungogo



Dimapur, Yimpoksüi/Nov. 07 (TYO): State College of Teachers Education, Kohima (SCTE) Hon Jubilee (1975-2025) mung sentong 'Empowering Teachers, Enriching lives' omen kübok Capital Convention Centre, Kohima nung November 7, 2025 nü munga liasü.

Principal, Mokokchung College of Teachers Education Dr. T Alemla Longkumer-i iba Jubilee asoshi shilem balala nung yaritepba asoshi pelaba lemsatepa liasü.

Shisaluyim ya temelenshi indang gari ka lir aser tesayurtem ya temelenshi indang tongti 'agents' lir, ta lai ashi.

Temelenshi alitsü asoshi

nüngdakba peritsütsü atema tesayur takum nung 'self-empowerment' ya kanga tongtipang lir, ta ashi. Computer teyari nung angazükba nungi computer nung amendaker angazükba aser AI nung amendaker angazükba temelenshi tem ngua arur aser iba temelenshi agi kongshiba ya kodanga matalokdangba lir aser küm ishika tsüngta profession aika bushitsü aser yangjia tesayurtem melenshitsüla aser technologies den update süa alitsüla, ta ashi.

Shisalion asoshi küm 50 bendanga agütsür service agütsüba ya takok tulu lir aser iba Jubilee ya mapang süyia aoba indang kisüng masü saka

asen state nung teacher education aser educational development nung institution kati mapa tajung jenti inyaka aruba benjong lir, ta Principal, Fazl Ali College, Dr. I. Wati Imchen-i ashi.

Küm 50 tashi State College of Teacher Education ya academic excellence aser professional formation indang tongshi ka ama nokdaka, tesayur putu aika renemshija aru aser parnoki asen school aser nüburtem mulungsentsü aser tekolok shisatsü yanglushitsü, ta pai ashi.

Iba reju ajanga tesayur nem training agütsüba, curriculum yangluba aser 'pedagogical innovation' shilem agia Nagaland nung shisaliok

tejakleni aoba nung shilem tulu agiogo, ta pai ashi aser SCTE kibong nem tenüngsang agüja liasü.

Ex-Officio Director, Higher Education Department, V. Lovitoly Sema, NCS-i jembidang, küm 50 ya mapang asadangba kisüng masü saka ochi, tasü ita nokdakba aser asen state nung shisaluyim asoshi bendanga agütsür inyakba kuli lir, ta ashi.

Küm 50 tashi bendanga agütsüba ajanga college nungi tesayur jenti adokdaktsüogo aser parnoki state kinük-kisang tashinung tesangwa bener arutsür aser tangazüker zünger mezüngmai alir nem shisatsü agütsür, ta ashi.

Tesayurtem ya temelenshi asoshi milen amertem lir aser tesayur nem tashi agütsüba ya asen lokti nung tekolok shisatsü indang rongsen nung sen bendena ayur amai lir, ta lai ashi.

Iba sentong nung Sarita Yadav, IAS, Secretary, Higher & Technical Education ajanga virtual yimya nung Golden Jubilee Monolith lapoktsü aser Pro-Vice Chancellor, Nagaland University, Kohima Campus, Prof. N. Venuh-i Jubilee Souvenir aser Memento sayaja liasü.

Niuland nung water supply yanglushiogo

Dimapur, Yimpoksüi/Nov. 007 (TYO): Niuland town nem tzu supply agütsüba October 25, 2025 nü PWD (R&B), Dimapur Division ajanga asaa masü 'maintenance' mapa inyakdang Niuland-Zhadima lenmang nung 4th km nung raksaa liasü.

PHED-i lenmang anasa rema aliba pipes nung maitsü inokja liaka lipak tsütsü jana toktenba mapang raksa jila nem tzu agütsüba nung tetsükdaktsü ajurua liasü.

Anungji Deputy Commissioner, Niuland and Chairman DWSM (District Water and Sanitation Mission), Sara S. Jamir-i November 4, 2025 nü PHED aser PWD (R&B) den senden ka mena iba tzu supply yanglushitsü sentong jembia liasü.

Iba teraksaba ajuruba sülen nüburtem aser office balala nung timtem ajuruba mechi DC Niuland ajanga department ana dang teka amteper ghonda 48 tsüngta iba tzu supply yanglushitsü ajungshia liasü.

Jembiba ama PHED, Rural Division, Dimapur ajanga November 5, 2025 nü iba tzu line raksar aliba yanglushiba mapa inyaka takok ngua yangluteta liasü.

PHED nungi sangdong ajanga ashiba agi, public water supply system nung teraksatsüba aliba atema BNS 2023 indang section 326(2) nung aiba ama merenshitsü aser raksatsür tem nem yangludaktsüsü.



November 07, 2025 nü Goa yimtiba, Panaji nung BJP pur Special Intensive Revision (SIR) 2025 Training Workshop nung Goa Chief Minister Pramod Sawant adenba noksa nung angur.

US Tir Donald Trump-i sangküm India semdangtsüa akok

New Delhi, Yimpoksüi/ November 07 (Agencies): India aser US na tsüngda shishilembaba dak sendakba nung tang ken o tejembidak mapang nung United States Tir, Donald Trump-i Ato kilonser Narendra Modi nem tenüngsang agütsü aser sangküm pai India semdangtsüa akok, ta metetdaksü.

Temang touzük ajema kümdaktsüba mozütem nung jenjang ajemtsü, ta sangdongba sülen White House kima osangbenertem den jembidang

Trump-i, Ato kilonser Modi tena ken o jembiba tsütsü terenlok kanga lir aser tena tesendaktep junga lir, ta metetdaksü.

"Pai (Modi) Russia dang nungi totzü aliba kanga ajema kümogo. Pa ya kü tembar ka. Narendra Modi ya jangratemtsü nisung ka lir. Pa ya kü tembar aser pai kü nem par linük (India) semdangdaksüner. Iba atemaji onoki shisadangtsü. Ni semdangtsü," ta pai metetdaksü.

Osangbenertemi pa dang,

nai sangküm India semdangtsü asü?, ta asüngdangba langzüdang Trump-i, "Hau, ibaji takoktsü," ta ashi.

Mongolbarnü White House Press Secretary Karoline Leavitt-i, "India-US tesendaktep junga lir ta Tiri bilemer. Hopta ishika tejaklen Oval House nung Diwali amongba mapang nung pai (Trump) Ato kilonser den jembi aser aser White House nung alibaIndian-American tongti ketdangser aika den jembiogo," ta metetdakja liasü.

Haryana nung police sub-inspector ka zükset

November 07 (Agencies): Brihostibar aonung Haryana nung police sub-inspector ka par kima zükset; pa züksetertemji kiyongertem lir, ta osang ka ajanga metetdaksü.

Brihostibar aonung 11:00 ako meta Dhani Shyam Lal kiyong nung tebur telok ka asatepa liasü. Tebur telok ka asatepba olaji angashia arrshi küm 57 sub-inspector Ramesh Kumar-i kima alu aser parnok arrtsüba sülen parnok senshi, ajisüaka kobi melii parnoki lung aser süng amer aruba sülen pa dak kanga mejungi azükba agi pa tekolak kanga mejungi yiru.

Hisar nung Superintendent of police, Shashank Kumar Sawan-i, "Pa züksetertemji kasa kiyong nungjisa alir," ta metetdaksü.

Ramesh Kumar ya mapa nungi anisüngzüksü atema joko ita ana dang liasü. Pai jala ana den jabaso ka toktsür pilaogo.

Iba ken o dak sendakba nung police-i nisung 10 anema ken o benok aser parnok rongnung nisung pongubo puogo.

Police-isa aibelenertemi amshiba gari ka den scooter ka puogo.

Indian National Lokdal Tir,

Abhay Singh Chautala-i, "Iba ya Haryana nung BJP indang gol ana keta aliba tensa lir. Ozüing melen tangbo tetsübu lir," ta aitsü.

Paisa, tang sub-inspector tepsetba ya police ka tepsetba dang masü saka Haryana yimti lenmangtem nung ozüing süadokba temaitsü lir, ta ashi.

"Tanü Haryana nunger ajak melung nung tasüngdangba ka lir. Security agütsütsü atema mapa lezmükba alirtem-a kümzüka melira gol ana keta aliba state nung koma ser nüburtem kümzüka alitsü?" ta paisa metetdaksü.

Supreme Court-i school aser hospital nungi azü agientsü tuyur

New Delhi, November 07 (Agencies): Shisaliok rejutem aser hospital nung kibur maliba azüi nisung aika dak angoba ken o angadangba mapang nung Supreme Court-i, shisaliok rejutem nung aliba azüji shelters nung puoktsü tuyu.

Justices- Vikram Nath, Sandeep Mehta aser N V

Anjaria nungeri akümba bench-i ketdangsertem dang lenmang nung nemzüba shiruru aser kibur maliba azüi ajak lezmükja aliba shelters nung puoktsü tuyu.

Bench-isa ketdangsertem dang kibur maliba azütem shisaliok rejutem aser hospital telungi meyoktsü tuyu aser item ama azüji apuba sülen kasa

tesem nungji mechioktsü tuyu.

Court-i National Highways Authority of India danga shiruru kanga bulua nemzükb highways tesemtem jangjaba sülen iba osangji metetdakjang ta tuyu.

Supreme Court-i maneni iba ken o ya January 13 nü angadangtsü.



New Delhi, November 07, 2025: New Delhi nung aliba Lodhi Garden nung kibur maliba azü nemzüba noksa nung angur. Educational centres aser hospitals ama nung kibur maliba azüi nisung dak angoba kanga bulua atatlokba ken o dak sendakba nung Hokolbarnü Supreme Court-i item ama azüji shelters nung puoktsü tetuyuba agütsüogo.

Bhubaneswar nung 84buba Indian Roads Congress tenzükogo

New Delhi, November 07 (Agencies): 84buba Indian Roads Congress senden Hokolbarnü Odisha yimtiba, Bhubaneswar nung tenzükogo.

Anogo pezünü sentong ya "Better & safe roads" nung ajemdaker agir.

Road transport & highways Union Minister, Nitin Gadkari aser Odisha chief minister Mohan Charan Majhi nati iba sentong tenzüktsü. Iba sentong nung linük tesem balala nungi tejaoker 3,500 dak tali adener.

Odisha public works department (PWD) minister, Prithviraj Harichandan-i, "Gari lendong mataloktsüa gari lenmang yanglutsüji sorkar

mangdang lir. Lendong mataloktsüa gari lenmang yanglutsü atema onoki onok tajungtiba agi inyaker. Iba atemaji onoki road maintenance policy ka benokogo aser technology-a amshitsü," ta metetdaksü.

Minister-isa, BJP sorkar yimsüsüba kübok state nung gari lenmang network tajungba kümogo, ta metetdaksü.

Harichandan-isa, "Tang nungibo mapa junga meinyakra ibaji contractors khuret asütsü. Gari lenmang tajungba akümtsü aser lendong ajema akümtsü atema onoki bypass roads yanglushiba densema telemetba aika agia inyaker," ta metetdaksü.



November 07, 2025 nü Srinagar nung kaketshirtemi temesepba mozü anema longkak aitba noksa nung angur.

India aser Finland na tsüngda FOC senden amen

New Delhi, November 07 (Agencies): Hokolbarnü Helsinki nung India aser Finland na tsüngda 13buba Foreign Office Consultations (FOC) senden mena linük ana tsüngda lenla balala nung amalitepa inyaktsü asoshi jembiogo, ta Ministry of External Affairs (MEA)-i sangdong ka ajanga metetdaksü.

Secretary (West), Ministry of External Affairs, Sebi George leniba nung India nunger ketdangsertem aser Permanent State Secretary of the Ministry for Foreign Affairs of Finland, Jukka Salovaara leniba nung Finland nungi ketdangsertemi onük balala nung o lemtep.

Linük ana nungi ketdangsertemi shishilembaba aser investment, digitalisation, quantum computing, 5G/6G, AI, sustainability, clean technologies aser rongsenkettsüng sectors nung amalitepa inyaktsü atema jembiba den külemi linük ana nung nüburtem tsüngda tesendaktep, shisaliok, research aser terenlok lenlatem nunga amalitepa inyaktsü jembi.

MEA-i, "Telok anapronglai India-Finland tsüngda tesendaktep jenjang asadanga shishilembaba aser investment, digitalization, quantum computing, 5G/6G, AI, sustainability, clean technologies, rongsenketzüng, shisaliok, research & development, nüburtem tsüngda

tesendaktep lenlatem nung maneni amalitepa inyaktsü bangjemogo," ta metetdaksü.

India aser Finland nati India-EU Free Trade Agreement agitetsü nükjidong nung maneni jembishinüa inyakdar.

Finland-isa UN Security Council nung India permanent züngsem akümtsü atema India pusemer.

MEA-isa, "India-i Finland ya EU aser Nordic region nung melung lemtetba partner ka ama züngshir. India-EU Strategic Partnership kübok Finland den amalitepa inyaker aser Finland-i tekeraba nung India-EU Trade Agreement agidaktsüner. Senden nungsa Arctic aser UN nunga linük anati amalitepa inyaktsü atema jembiogo. Finland-isa UN Security Council nung India Permanent züngsem akümtsü atema pusemer," ta metetdaksü.

Sibi George-i Helsinki semdangba mapang Finland Employment Minister Matias Marttinen-a ajuruogo.

"Tanü Secretary (West) Sibi George-i Helsinki semdangba mapang nung pai Republic of Finland nung Employment Minister Matias Marttinen-a ajuruogo. Tenati sempet lemsatepba, Finland nung aliba India nungertemi shilem tajung agiba aser Talent Boost Program kübok India-Finland partnership tajungba akümtsü atema jembi," ta metetdaksü.



TIR YIMYIM YIMOBILEM (EDITORIAL)

DIMAPUR

KÜPTOKNÜ

YIMPOKSÜI 08, 2025

Temulungjang tashidak aser mozü

Tain kümer nisung asübaji alima yimya, ajibo akümlir sentsü küpdokerba dang, saka tanü asüng lanurtem küm 30 majungertem dak dena temulungjang tashidak agi amakba (heart attacks) ya yimten, lokti aser tsüraburtem ajak asoshi shisabolutsüka lir. Yimya agi temulungjang tashidak ya jashiba aser shisaboluba nungi adoker saka kodang lanurtem aika temulungjang tashidak agi tongdir, ajibo shisaboluba aser jashiba kisüng dang atongtsüla masü saka parnok libaliru aser jaklayimya indang süoki ia bushidangtsüsa adoker. Aji oda, asen lima nung dang masü saka India ajunga nung temulungjang tashidak agi nisung asürtem rongnung 50% bo arishi küm 50 teküpbok purtem asür ta asadangteter. Ibaji kodang bilemdangdir, iba timtem aser tebilemtsü ya menokdangtetra, tarutsü lanu putu asoshisa tebilemtsü tuluba kuma aotsü. Aji oda, alima nung ya nisung taküm alibaji teperi masü saka takümü meshirangi arshia khümkhüma alitsüla ta nisung shiai angatetsübaji kanga tongtibang kumogo. Nisung taküm ka anema alitsüba ya tasodang nungi tenzüker, anungji tsüraburtem dak tuluka keta lir. Tanü lanurtem temulungjang tashidak agi ajungbena-ajungbena asüba ya tsüraburtemi kidang pei chirnurtem tali meima amshiba nungi tenzüka tebilemtsü amai angateter. Tali meimba tetezü asenoki tanurtem nem chiyongtsü tajung onsara tali chidaktsür aser parnok temang nungi asentzü sentoka mapabo kecha meinyakdaktsür. Atangji, anema alitsü atema chiyongtsü tajung achitsüla saka tajung asüyonga onsara tali chira, ibaji temang asoshi majung akümer. Ano, temang anema alitsü asoshi anisüngzük mapang peria agitsüla saka temang kenyonki marakzü aser tetsüng agi mera kata mejaoka ki atena mejajadanga takümü peisasa pei temang marakzüktetsüsa alena ayuba amai lir. Tanü asenok kibong aika nung tanurtem dang masü saka taintema chiyongtsübo tajung ajak bendena chiyongtsü saka temangbo kenyonki marakzütsü aser tetsüng agi mera kata maotsü ta kidang monger kümer aika lir. Itemji shisatsü aser tokolok ulutsü masü tebokang chizüktsü aser temang tulu kuma longa moutet mokdaktsü. Delhi nungbo school tanurtem noklang nung shilem 60 bo temang tulu kuma chizükba asadangteter. Kasaji, asen lima nunga asadangtetsüsa akok. Item tebilemtsü akoktsü asoshi bushidangertem rongnung Noida nung Fortis mozü kidang Interventional Cardiology department nung tokolakba Dr.Sanjeev Gerai ashiba agi, lanurtem dak temulungjang tashidak agi atongba timtem aser tebilemtsü ya shisabolutsü tuluka kumogo, anungji iba tebilemtsü akoktsü asoshi mapang shia temang tendanga alitsüla aser tongtibang teinyaktsü kaji asenoki 'Blue Zones' nung alirtem jilu ajizüka tanur tain ajak temang arakzüka, asentzü sentoka alitsüla aser kija rongjena melii lokti den külemi pelatepa alitsü merangtsüla. Blue Zones ta asüba ya alima nung tesem pungo lir, itemji Japan nung Okinawa, Italy nung Sardinia, Costa Rica nung Nicoya, Greece nung Icaria aser California nung Loma Linda lir. Item tesemtem nung alir sobaliba aser libaliruji akok tashi parnoki temang arakzüka jajar aser asentzü sentoka mapa inyaker, lokti tenteta külemi alir aser chiyongtsü nung kanga kümdanga chia ajemer, iba jagi item tesemtem nung alirtemjibo arishia küm noklang junga aliba dang masü saka anema alir. Aji oda, tanur asüadang nungi asenok tsüraburtemi anir chiyongtsü tajung süaka onsara machitsü, Tsüngremi jajatsü yanglutsüba tetsüng agi anogo shia ghonda kabo jajatsü, temang arakzüka asentzü sentoktsü, ghonda 6 nungi 8 tashibo mejangtsü aser asen kidang asen kija chiyongli, menli, mejangli ta melii, asenoka tangar bushia oa lokti nung alitsü aser loktia asen bushia arudaktsütsü ta akok tashi loktii ozü asoshi kechi inyaktsür ta masü saka nia lokti asoshi kechi inyaktsütsü aser koma shilem agitsü ta tajung-tajung inyaktsü bilema lira, temulungjang dang masü saka tokoloka dena pelaa alitsü. Aji oda, asenok tsürabur aser tanur ajak mobile phone amshiba agi mejangtsüa aser chiyongtsüa mapang manguba tia ya jet ta meyipteper, asenok mapa inyakba agi mobile phone amshitsüa mapang mangutsüsa alitsüla. Itemji asenok asoshi temulungjang mozü tajungtibatem asütsü.

OLEMSABANG

ABAM President kisüng masü local arogo ground level tashinung melenshitsüla

K. Lima Longkümer

1. ABAM nung melenshitsü reprangtetba ana. Nüklu Longkümer Dimapur. Dt. 15/10/2025.
2. Arogo aser ABAM ya shirnok meyong? Limawati Longchar Kohima. Dt. 16/10/2025.

Tasüngdangba onük ana ya Toklang Tenzükker-i koda langzüla, aser ya tasüngdangla asü masüngdangla aser Arogo nung züngsemtemia (Sarudokker)tanü Arogo aser mungdang nung Arogo Yimden kechi koma inyakka odar metetta lirna? Tanü Arogo aser ABAM nung toklang tenzükkertemi sobaliba aser awashi senzükka yutsüba jogo küm ishika parnoki pilembajiang shidak ta penshia aruba. Parnoki tanüla nung mesübatemdak tamang makar, parnok mesüba kiburtemiji tamang nung main ta pilemmer südi parnoki itempur dak nüma madanger südi, parnokji tenüng agi amanger ta metet südi, ano alitsüa akok. Arok meyong Arogonung Laishir toklang tenzükker-i post 90% aser Arogo general nungi IIIrd grade & IV grade ajak semtepper 10% lir (Arogo Secretary Karbo lum-sum-ang akir lir, ano karibo itasen maki inyaker lir.

Theology zünger Toklang tenzükker nem maongka olura Arogoi agütsür.

1. Pastor aser Associate Pastor aniokdang installation sentep sentong akidang Arogo nung tenzükker ajak den ainner tenna chiyongtsü renemtsür.
2. Pastor Licence agütsüba sentep Sentong nung Arogo nung inyakker Department ajak nungi aser ainner tejaokkertem tenna chiyongtsü renemtsü.
3. Pastor aser Associate Pastor-tem Ordination sentep nung Arogo-pur ajak den tejaokkertem chiyongtsü.
4. Pastor aser Associate Pastor-tem town Arogo nung tenzükkertem pa/ la tasoba Arogo nungi aser Pa/la tenzüka Arogo anaprong melenteppa jaokteppa sentong akir.
5. Pastor/ Associate Pastor-tem farewell sentong akitsü Eg:- Pastor, Associate Pastor/ Women Leader, Associate Pastor (Youth). Item pungu (5) sentong ya Theology zünger toklang tenzükker atema dang lir.

Item ajak nungji Expenditure kwi adoktsü?

6. ABAM kübok Arogo 170 nungi Pastor tem telongjem (Union/ Fellowship) akaba ajanga Arogo tem nem kechi tajangzük agütsür. Board of Deacon-i metettsüla.
7. Reverend (Union/ Fellowship) tentetba ajanga Area aser ABAM/ Arogo tem nem tajangzük agütsüba kechisa?
Reverend aser Pastor tem fellowship akaba ajanga NLTP ACT 1989 tajangzük agütsüba tebangmung kecha mangur. Ajisaka Reverend fellowship akaba tamaitü ABAM nem tajangzük agütsüba kaji Naga tenem nung mezüng Arogo tenzüka koba molungkimung yimdak 1872 22 December anügo tenzü ibaji 1876 nung mesemba yim nung Arogo-ji 1872 kum 22 December anügo tenzü ta kuli Reverend terok (6)-i züluba shiti du tamamangtsüka.Parnok Reverend-tem Reverend akümba ya Tsüngrem nem bendanga agütsüba masü saka obendanger telok akümmen. Parnok terok-i agütsüba asü Reverend telongjem fellowship-i agütsü parnokiang metetsü. Arogo Ao lima nung mezüng tenzüka anügo raktepdaaktsütsü ABAM-i lenmang lapoktsüba mechi tanü lanu putu alir telok 3/4-i High Court nung khünou agüja aliba angashir. Anungji 1872 raktepper mungdang ka aser 2026 küm tenzüka mungdang ka ta lemdang nung koma cüla? Ake ABAM tenzükker aser tanü laishir Toklang tenzükker-i tambo raktepba aser tekolak kümnübayong Aor tanela aser Ao tejak ajak raksatsüogo, Aor tamangba koba nung amendakka lir???
8. ABAM Executive secretary bo alaktetta Arogo ajak nungi jaokka Farewell sentong tulu akitsü.
9. ABAM President-bo pa term ka küm 3 or 5 tenzükkerbo ABAM Mungdang tatembang aonung sudi agütsür. Pa atemaji sentong palaka akiba mali. yamaji khristar Arogo Mungdangi nisung dang kaa sadangsaria inyakba/ penshibayong taoba Executive Secretary Farewell sentong nung adentsü aodang Pastor ka lenmang nung tsüksetta asüba du pilemdangngangjo. Aor Tsüngrem tenzükkeri nisungdang kaa partiality penshiba jentisa jenti lir. Tsüngrem-ibo shinga mesadanger. Lenmang talang pelemsetta anir bi lima madong pendanger kin ana artsü nung atalokba du thangari Aor Pastor bimungdangi aodang tsükset ta thangari asen tia asadangtsüsa atalok, nenokia koda asadanger?

Serial number 1-9 tashi nung indokba senjagi Arogo 170 dakji pentepa küm nung kwi adoktsü, aser iba denji parnok nem itasen agütsübabo mezüngshir. Saka parnok kiboksem nungbo dazüngla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Cincinnati nung kaketshir 2,000 dak tali Arogo nung züngsemogo



November 05, 2025 aonung University of Cincinnati nung UniteUS sentong tembangba sülen University kima truck ka nung kaketshir ka baptidang tangokba noksa nung angur.

November 07, 2025: Bodhbar aonung (November 05, 2025) Cincinnati University nung UniteUS sentong nung lanur 5,000 dak tali aden aser kaketshir 2,000 dak tali-i Khrista agizüka Arogo balala nung züngsem kümdaktsüogo.

Tang tesüsa University of Cincinnati nung ayongzüka agiba UniteUS sentong nung kaketshir 5,500 dak tali aden aser tang mezüng parnok aikati Yisu nem taküm bendanga agütsü.

Iba dak alia iba sentong nung adener kaketshir noklang aika Cincinnati Red Stadium kima tzü nung baptiogo.

UniteUS tentetla, Tonya Prewett-i Instagram ajanga, "Taonung University of Cincinnati nung onoki kuli süa angubaji kodak amai liasü. Yisu Khrista ajanga angati nüchiso anguba atema Kibuba nem tenüngsang agütsür," ta

metetdaktsü.

Prewett den Pastor Jonathan Pokluda aser IF:Gathering tentetla Jennie Allen nungeri US tesem balala nung aliba college campus aika nung UniteUS sentongtem nung shilem agia arudar, aser kaketshir meyrjang aikati Khrista nem taküm bendanga agütsüogo.

Pastor Pokluda-i Instagram ajanga, "Yasüng agiba sentong ya khenyongi balaka liasü," ta metetdaktsü.

Iba University nung azünger Anna Brown-i Instagram ajanga, "Yangi Tsüngrem lir aser Pai iba putu lanurtem den mapa tulu inyaker. Iba sentong asoshi Kibuba nem tenüngsang agütsür. Yisu, kü taküm kümzükba atema pelar," ta metetdaktsü.

2023 küm nungi tenzüka US tesem balala nung UniteUS sentong agia arur aser tan

mongpu kija nunga kaketshir 27,000 dak tali item sentong nung denogo.

Taoba ita Grand Canyon University nung kaketshir 7,000 dak tali UniteUS sentong nung aden aser aikati Khrista nem taküm bendanga agütsü.

Ghonda ana dak tali agiba sentong nungji nisung 4,300-i Khrista nem taküm bendanga agütsü aser kaketshir 251 baptia liasü. Ano kaketshir 2,600-ibo college ministries nung shilem agitsü jangrar ta ashi aser kaketshir 622 Arogo nung züngsemdakja liasü.

Tawa osangbenertem den jembidang IF:Gathering tentetla JennieAllen-i, "Kü den UniteUS lenirtemi tanü putu nung sayatonya ajangshidar. Tanur aika tejakleni arua temenen nangzüker aser Yisu sülen anidaktsü telemtetba agir. Ni iba ama ya kodanga majangshidang," ta metetdakja liasü.

Kyrgyzstan nung pastor Shreider jail nung temang tamajungba akümer



Pastor Pavel Shreider

November 07, 2025: Ita ter tejaklen Kyrgyzstan nung pastor ka jail nung puoka liasü aser tawa pa treatment agitsü atema jail nung aliba medical unit nung puokogo.

Arrshi küm 65 pastor, Pavel Shreider ya Kyrgystan yimtiba, Bishek nung aliba True & Free Reform Adventist Church nung pastor lir.

July 10 nü court kati pa küm asem tashi labor camp nung ayutsü obendang agüja liasü.

Yaküm November ita nung Kyrgyzstan National Security Committee (NSC) secret

police-i par ki mita aoba sülen pa pua liasü.

Arogo nung pai kin aser yimsü nung ajemdaker tesempa proker ta pa nem tai tonglokja liasü. Tangbo iba Arogo nungji tekülem sentong agitsü memelar.

Police-i Shreider apuba sülen pa dak kanga mejungi azük aser pai aibelenogo, ta pa nem kangshia nangzükdakja liasü, ta osang angazüker.

Pastor-i Bishek nung aliba National Center for Prevention of Torture nem tashishiba ken o ka agütsü saka iba center ji

taoba ita shibangadokogo.

Pastor-i, "Police pongui kü dak tekolak, teku aser teberem nung azük. Parnoki merang pipe ka amshia kü dak azük aser ni aibelenogo ta kangshia nangzükdaktsü," ta metetdaktsü.

Ano külen Arogo nung züngsemtemia parnok reshikangshigo aser pastor anema tiyazü kuli agütsütsü atema 'electric tasers' amshia reshikangshi, ta shiogo.

Iba ter tejaklen Shreider dak azükba sülen pa temang kanga mejungi aküm. Pastor dak 'encephalopathy' (tekolok yiruba) putetogo aser iba osangji par kibong nem-a metetdaktsüogo.

September ita nung par jala, Vera Shreider-i Prison No. 21 dang tebu nem medical teyari agüjang ta mepishia liasü. Iba sülen hopta ana tsüngda ano pa temang tamajungba küma jail nung aliba medical facility-i anir ogo.

Alima nung Khristantem alitsü atema linük tamajungtiba 50 rongnung Kyrgyzstan ya jenjang 47 buba nung lir (Open Doors' 2025 World Watch Ranking).

ANOGO ABEN TSÜNGREM DEN

Tekümdang Khristan ketdangsüba

Item o Kibubai Ola tulu agi jembi; Aser pai itemji lungpak ana nung zülu aser aji kü nem agütsü.

Tazüngkunem 5: 22.

Lenmang lemjem nung lungpak nung tekümdangtsü o zülur doktsür. Ibai motor anishir nem timtem agütsütsü atema masü, saka parnok kümzüktsü atema yutsür.

Kasaji ozüng ter Tsüngremi zülubajia lir. Aikati Tsüngrem ozüng kübok malir aser iba anema inyaker. Azü tokshiba, ochi mashiba, tepsetba, nüktapangta item ajakji ozüng kübok melitetba temaitsütem lir. Lenmang nung ozüng raksaba nungi adokba den Mosa nem Tsüngremi ozüng agütsüba raksaba nungi adokbajia alitsü. Ozüng raksar jagi pei sasa dak aser tangar daka teraksa tulu adokdaktsür. Tsüngrem ozüngji pei pur kümzüktsü asoshi lenmang kula ka ama Pa nübur kümzüktsü asoshi noktaka lir.

Tsüngremi Pa ozüng tejangja aser takang yanglu, kechiaser Pai asenok meimer. Asenoki asen temenen ajanga raksaa aliba tesüsü yangludaktsütsü asoshi Pei chir yokba ajanga Pa temeim tali jangja angatetter. Pauli yamai zülu, "Khrista nung, onok Tsüngrem temeshibaji akümtsü asoshi, shibai temenen memetet Pa asenok atema Pai temenen kümdaktsü" (2 kor. 5: 21). Khristaji kümtetdakba ta amangertem ajak Tsüngrem tsüngdang temeshi lir.

Madhya Pradesh nung police-i Khristan seminary ka mita ao

November 07, 2025: kibongtem nungi tanurtem nem November 5 nü Madhya Pradesh nung police aser sorkar ketdangsertemi Khristan seminary ka mita ao.

Iba seminary nungji kaketshirtem Khristan yimsü dangi meyipdaktsür, ta tai tongloktsüba sülen ketdangsertemi iba seminary mita ao.

Osangbenertem den jembidang St Joseph's Minor Seminary nung rector, putir Harshal Ammaparambil-i, "Onok nem jelia osang memetetdaktsüi police aru aser seminary mita aotsü takhangba agütsü. Onoki ozüng alema yimsü meyipdaktsür, ta tai tonglokja seminary mita reprangtsü takhangba agütsü," ta metetdaktsü.

Iba seminary ya küm 25 tejaklen tenteta liasü. Police aser ketdangsertemi ghonda pongu shi iba seminar mita reprang aser Madhya Pradesh, Odisha, Chhattisgarh nungi arua iba seminary nung azüngertem dang asüngdangyaa liasü.

Crime Branch nungi officers, police ketdangsertem aser Sub-Divisional Magistrate kati iba seminary mita reprang. District collector-i züngsem asemita akümba committee ka tentetogo aser parnok dang anogo pongunü tsüngda report agüjang ta tuyuogo.

Iba anogo nungjisa Hindi osangkaket ka nung, iba seminary nungji sensaker tribal

angati shisaliok agütsür aser Khristan yimsü dangi meyipdaktsür, ta osang proka liasü.

Putir Ammaparambil-isa, "Onoki police nem tsüraburi melungba forms, baptiba kulikaket aser Arogo recommendations densema kulikaket balala agütsüba sülen ang parnok meyipa oadok," ta metetdaktsü.

"Onoki mimshitsüsa kecha mali. Onoki Khristan kaketshirtem dang agizüker. Bushisüngdangba nung yariteptsü onoki melunga dang lir," ta paisa metetdaktsü.

"Osangkaket nung adokba report ji khenyongi tiyazü. Osang tai prokba atema iba osangkaket anema onoki ken o benoktsü tebilemba lir," ta pai metetdaktsü.

India nung anti conversion ozüng benoka aliba state 12 rongnung Madhya Pradesh state densema lir.

Madhya Pradesh nung Khristantem anema inyakba kanga bulua akümer, aser tang seminary mita aoba ya ketdangsertemi Khristantem dak tai aputsü nükjidong nung Khristan lenir, Daniel John-i metetdaktsü.

"Osang tai ka nung ajemdaker ketdangsertemi onok dak tai aputsü merangba ya süoki ia agitsü ken o ka lir," ta paisa metetdaktsü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim


Tongsa

(v) tsük /jang anüka ajensa (pound grains to powder)
* Jang tongsar amsu asor.

Tongshi

(n) ki tangitba tongti süng (main pillar)
* Lanurtemi arem nungi tongshi apur adok.

OLONG PAITEP # 7323



TIPIEN

1. Teka agi sot

3. Ken olasü

6. Tetemsü

8. Mokonga ait

10. Ku aser nuksemo tsüngda

11. Mi mejangrui aküm

14. Yisu Khrista agizüker

15. Nüngtem

16. Külemi

LANGTSÜNGLEN

2. Rajema lir

3. Kilong masü

4. Meyipa agütsüsü aliba

5. Tzüik asendak

7. Ozü alidak

8. Tanü ser külen

9. Balaka

10. Telongjem

12. Shi agi meibanga alir

13. Nemjema bilem

OLONG PAITEP # 7322 TELANGZÜBA

TIPIEN :

1. Telok, 4. Aluru, 6. Ozüing, 8. Emk,

9. Kin, 10. Teti, 12. Süir, 13. Jen,

14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kiochtsü,

5. Lenti, 7. Tajangzüik, 11. Teronem,

12. Sempa, 13. Jahaz.

NAI-A YA METETTER MA



England nung Chloe McNiven-i lar ita 10 tain jabaso Lake pram ka nunger senzüba atema Guinness World Record ka yangluogo. Chloe-i ghonda 4 ser minute 50 nung 50km (31 miles) tashi pram nunger senzüba ajanga alima otsü tasen ka yanglu. Sussex nung aliba Goodwood Motor Circuit nung lai mapang tekaratiba nung pram nunger senzü.

Tenüing : **Sungzukmong Imsong**
Tasoba : **8th November 2024**
Küm : 1st Birthday (ka)
Talidak : Kohima
Yim : Wameken

Jabaso takum nung mezüing Tasoba Anogo moatsüba asoshi tulusang Tsüngrem tenüing asanger, Tsüngremi areshi talang, ajemalu, temoatsü aser shisatsü temaba nung moajangma ta Oja, Oba aser Kinunger ajaki sarasadema tepela salem lemsateper.

Happy Birthday Chanuba



Assam Rifles-i Arunachal nung 'Vande Mataram' benjung amung



Dibrugarh, November 7, 2025 (Agencies): Arunachal Pradesh nung aliba Khonsa Battalion, Assam Rifles-i

Hokolbarnü National Song 'Vande Mataram' küm 150 ajungba tenüing nung sentong ka ayongzüka agiogo.

Iba nüngtem nung November 7 nungi 14, 2025

tashi linük ajungalen sentong balala ayonga amungtsü.

Tirap district kübok Lazu, Noglo, Wakka, Soha, aser Deomali nunga Khonsa Battalion ajanga iba mesükba sentongtem ayonga agiogo.

Assam Rifles-isa nübortem dang official Government portal

vandemataram150.in nung 'Vande Mataram' indang ken atenba upload asütsü ayongzüko.

'Vande Mataram' ya India freedom movement den sendaktepba dang masü saka linük telongjem aser meimba tamaisü ka ama lir ta AR ketdangsürtemi ashi.

Assam nung Saotal nungeri ST jenjang meshir

Guwahati, November 7, 2025 (Agencies): All Saotal Students' Union (ASSU)-i November 7 nü lungkak aitba sentong tulu ka ayonga agiogo.

Assam nung Saotal nunger nem Scheduled Tribe (ST) jenjang agüjang ta takhangba agüja parnoki lungkak ait.n

Iba sentong ya Kokrajhar District Committee-i teyari agüja ASSU Central Committee ajanga ayongzüik aser nisung noklang aikati shilem agia liasü.

Karigaon High School Jaipur High School playground tashi lungkak aitertemi National Highway 27 nung jaja.

Lungkak aitertemi banners amer aser temeten meshi yimyim ayima senzü. Parnoki state aser centre sorkartem dang parnok nem mapang talangka magütsüi aruba meshia yimyim ayim.

ASSU lennirtemi Constitution nung Article 342 kübok Saotal nunger Scheduled Tribes nung

züngoktsü takhangba agütsü.

Parnokisa Saotal nunger nem land pattas, official community certificates agütsüsü aser 2022 nung Tripartite Adivasi Peace Accord mapa küma inyaktsü takhangba agütsü.

Saotal nunger ya Assam nung arua alir mezüingpurtem lir saka constitution kübok temeten mangur. Sorkari mapa meinyakra ozüing melaba ama state ajungalen lungkak aittsü ta Saotal lennirtemi metetdaksüogo.

IFFI 2025 nung Manipur documentary 'Battlefield' sayutsü



Imphal, November 7, 2025 (Agencies): Ministry of Information & Broadcasting

ajanga Manipuri filmmaker Borun Thokchom-i yangluba documentary 'Battlefield' shimtetba osang metetdaksüogo.

56 buba International Film Festival of India (IFFI) 2025 nung iba documentary ya Indian Panorama section nung sayutsü ta parnoki ashi.

November 20 nungi 28 tashi Goa nung IFFI 2025 amungdang

iba film ya world premiere asütsü.

Battlefield ya Manjoy Lourembam, Dr Radhesyam Oinam, aser Viswamithra Universals ajanga produce asü aser Manipur nung World War II ajanga tarak kettsüba indang lemsateper.

World War II nungi jenburtem aser iba ajanga kongshiba kibongtem indang otsütem iba film ajanga ashir.

Iba film nung war researcher Rajeshwor Yumnam-i shilem

agir aser küm 10 shi ka agia otsü balala bendena yanglu.

IFFI ya South Asia nung FIAPF-accredited film festival lir aser international festivals rongnung züingsemer.

Battlefield ya 2022 küm "Imphal Documentor" lab nung yanglu. Iba lab ya Manipur State Film Development Society (MSFDS), Documentary Resource Initiative (DRI) Kolkata, aser Television Cine Foundation Manipur yaritepa tenzüka lir.

Pakistan aser Afghanistan ceasefire nung aibelenba nüngsenteper

Ankara, Yimpoksüi/Nov. 07 (Agencies): Turkey nung Pakistan aser Afghanistan ketdangsürtem adenshia ceasefire renema ayutsü jembishinüba mapang arütsülen mapang tatsüka raraba asoshi Brehostibarnü linük ana tsüngta tenüng sentepa liasü.

Spin Boldak region nung arütsülen ceasefire anema inyak ta tai tonglokja Afghan Taliban-i Pakistan dang telangzüba meshia liasü, aser külen Afghanistan-i injang khaloktsü tenzük ta Islamabad-i aitsür.

Afghan Taliban ajanga ashiba agi, Pakistani security forces temi Spin Boldak check post nung injang-bomb khalokja Afghan sepai aser civilian tem densema nisung tenet kanga sashia yiru. Ajisüaka Pakistan-i ceasefire nung aibelen masü ta ashi aser ibai Afghan hungeri tashiyim amshiba nung telangzüba agütsüba dang lir ta ashir.

Pakistan inyaksangshi agi ceasefire nung aibelener, saka yimjung ken o jembishinüba akumtsübobba mechi tang tashi

telangzüba agüja mali, ta Islamic Emirate of Afghanistan-i ashi.

"Ibai anogo ishika tejakdang agreement agiteper aliba nung Pakistan-i aibelenba lir," ta Taliban odongtar Zabiullah Mujahid-i ashi.

United States envoy Zalmay Khalilzad-ia iba mepetmesü aitsü. "Iba yagi agreement yanglutsü nüngdaka aliba tamang nung timtem agütsür. Tanü amakba atema Islamabad-i nüngdakba rateta ashitsüla," ta pai ashi.

(Maneni tapak 8 nung...)

China nung missile sentongtem tuluba akumer

Beijing, Yimpoksüi/Nov. 07 (Agencies): 2020 küm nungi China-i missile production centres tem kanga kera ulushia aiba ya United States aser par tembartem asoshi tebilemtsü tulu akumer.

Tawa satellite ajanga tangokba noksa tem nung China ya par Rocket Force (PLARF) aser defence production dak sendakba nung tesem 136 lir, aser item tesem ya shilem 60 dak tema tesüiba küm pongu tsüngta kanga ulushia yanglur aliba sayur.

Satellite noksa tem nung factory towers, bunkers aser test centres tasen ajiteter aser tema nung missile yangluba nung amshiba oset yua aliba ajiteter. Item tesemtem nung kisüjenshiba ya 2020 küm aliba dang nungi 2025 küm 2 million square metres shi tali kumogo. Yimtsüng aser alu aika nung military complexes yanglua lir.

Xi Jinping ya 2012 küm China tir akumba sülen People's Liberation Army (PLA) ya "world-class fighting force" kumdaktsütsü nangzük aser Rocket Force (PLARF) ya China indang jong aser national security tamendak dak amai lir.

PLARF ya China indang nuclear aser ballistic missile programmes asoshi tiyongtsü lir, aser tangbo ibai United States anema toktepba nung tongtipang aser Taiwan amaktsü asoshi renemshiba mera ka amai lir.

Item centres tasen nung missiles yangluba ya Taiwan agitsü atema China tasa tongtipang ka asütsü, koba US Navy temia metongtettsüsa "anti-access denial zone" adokdaktsütsü nükjidong lir ta mongintemi ashir.

"US mesüra tembar linüktem nungi teyari meyokdaktsütsü mechi China-i Taiwan indang rongnendak, helipads aser supply bases tem nung tenük yoktsü sentong lir, ta ashir.

LIST OF SELECTED PARTICIPANTS FOR STATE HANDLOOM EXPO AT URBAN HAAT, DIMAPUR, NAGALAND W.E.F. 11TH NOVEMBER TO 24TH NOVEMBER 2025.

Sl.No.	Name of Participants	Address
1	Chanda Kumari	Panipat
2	Pyare Lai	Panipat
3	Choikhaw Lukham	Arunachal Pradesh
4	Yabi Tatak	Arunachal Pradesh
5	Nabajyoti SHG	Assam
6	Nurjahan Begum	Assam
7	Rashma Begum	Assam
8	N. Pongben Konyak	Chumukedima
9	Bautan	Longleng
10	Bendangnaro	Mokokchung
11	Shongmao Lam	Noklak
12	Lochumlo Ngullie	Chumukedima
13	Chaifying	Mon
14	Tohoni	Zunheboto
15	Kekhrietsu Weaving Unit	Kohima
16	Bendanglemla	Mokokchung
17	Z. Omegali Assumi	Niuland
18	Kurepralu Sapuh	Chumukedima
19	Chibeni Grace Yanthan	Wokha
20	Khesheli	Zunheboto
21	E. Merry Phom	Longleng
22	Atoholi Chophy	Niuland
23	Yimsunaro. B	Mokokchung
24	Nukshimenla	Kohima
25	Hushika Yeptho	Zunheboto
26	Petevinuo Sote	Kohima
27	Ronsenle Kent	Tseminyu
28	Satemnungla	Mokokchung
29	Tokugha Chishi	Niuland
30	Grace Kent	Tseminyu
31	Bohoto Achumi	Zunheboto
32	S. Akanglemla	Mokokchung
33	Temsumongla	Chumukedima
34	Hinyele Seb	Kohima
35	Asang T Konyak	Mon
36	Arentola	Mokokchung
37	Hekatoli	Zunheboto
38	Imsho Phom	Longleng
39	Apila Sangtam	Chumukedima
40	Mughato	Zunheboto
41	Washimenla	Mokokchung
42	Holitoli Kappo	Niuland
43	Beino	Kohima
44	Mughavi Y Sumi	Zunheboto
45	S. Onentila	Mokokchung
46	C. Choyau Phom	Longleng
47	Pelhoutuou	Chumukedima
48	Kibotoli	Zunheboto
49	Odongjungla	Mokokchung
50	Tiala Jamir	Chumukedima
51	Asenla Longkumer	Mokokchung
52	G. Xutoli Awomi	Zunheboto
53	Putuyangla Longkumer	Mokokchung
54	Lipongla Sangtam	Chumukedima
55	Vilatuonuo Sote	Kohima
56	Akumnungla Ozukum	Mokokchung
57	Anne Yeptho	Zunheboto
58	Ketoukuo-u Sote	Kohima
59	Kivinoli V Yeptho	Zunheboto
60	Limawapang	Mokokchung

NB:-

1. The selected participants are directed to report to the exhibition ground at Urban Haat at 9 a.m. on 11th November 2025.

2. The participants are directed to keep their exhibits in their stall under lock & key. The office shall not be held responsible in case of any losses/ theft.

3. Selected participants must display genuine products with full stock, failure to do so will result in revoking their participation from the exhibition.

4. Selected participants are informed to reach at scheduled time. In case of failure, their participation in the event will be revoked.

Managing Director
NHHDC Ltd.

MULUNG NEN O



Tasoba Anogo : 09-09-1959

Tasüba Anogo : 30-10-2025

Onoki teti meima aliba aser kodanga amadoktsü makokba tsürabur Meyilemba Jamir (Mongsenyimti) asükhü nung shirnokisa sarasadem, nübu aser rongsen agi onok den yaritepogo, nenok ajak dang kanga pelaba lemsateper. Talisa Mongsenyimti Compound Baptist Arogo, Yimten, Kidong, kiyonger aser kinungertemi temeim sayuba onoki kodang mamatsü. Tsüngremi nenok maneni moajangma.

Temeim Kinungtsu aser Jala-Jabasotem.

Kodanga amadoktsü makokba temeim Ojala Sür küm Ana ajungba

Asür Chubamenla (Khar)

(8th November, 2023)



Pila ogo saka kodanga mamadoker. Na mali küm ana ajunger, saka onok mulungjang nung na aliba agi onok anisüngzüker. Nü temeim onok ajak den alir. Na kanga menunrar aser teti bilemteter.

Onok mulungjang nung na teti lir.

Kinungertem.

MULUNG NEN O



Asür MANGREPYANGLA

(27.10.1940 - 02.11.2025)

Onoki teti meima aser mamai aliba Ojala asür Mangrepyangla (Changki) shirangba mapang nungi tasü nü tashi shirnokisa temeim sayuogo nenok ajak dang pelaba lemsateper.

Tsüngdong aruagi nenok majurutetaka takarsang tsüngremi nenok kija, kibong, Arogo aser lokti maneni moajang ta ozü sarasadem.

Temeim chirnurtem, semchirtem aser kinungertem.

Longjang nung P. Shilu Ao Memorial Indigenous Games tenzükogo



ADC Mokochung, Atsunga Walling-i sentong nung jembiba mapang.

Dimapur, Yimpoksüi/Nov. 07 (TYO): Anogo ana atema P. Shilu Ao Memorial Indigenous Games Festival cum 2nd Tug of War Championship Hokulbarnü Longjang yimdak tenzükogo, koba ADC & Chief Executive Officer, MMC, Mokochung, Atsunga Walling-i moaja liasü. Atsunga Walling-i iba

sentong nung jembidang, asen libaliru ya anüolen sobaliba agi kanga kongshiogo, saka asenoki asen sobaliba den apetba dang amshitsüla, ta ashi. Anüolen sobaliba ajanga asen sobaliba tajung meraksadaksütsüla, koba putu sa putu amshia arur, ta pai ashi. Sobaliba tajung wazüka

ayutsü nükjidadong nung Longjang Rionsanger Cultural Society ajanga iba ama sentong ayongzükba atema pelar aser iba benjong dak alia tarutsü nung ano Asür P. Shilu Ao nem akhum agüja maparen balala inyaktetsü, ta pai ashi.

Asür P. Shilu Ao ya Nagaland indang mezügbuba Chief Minister inyakba kisüing masü saka pa ya linük meimer ka liasü aser Nagaland nung aliba nüburtem asoshi pa ket nung akaba ajunga agütsü, ta ashi.

Sentong nung Barrick, Longjang Village Council, Imtinungsang Longchar-i pela agizükba o jembiba aser Longjang Senso Mungdang tir M. Temjen Jamir-ia o tatsüka jembiba liasü.

Longjang Rionsanger Cultural Society ajanga sobaliba ken ka aten aser iba sülen Indigenous Games asaya liasü.

Naga Wrestling jenjang tulubai ajungkettsüla: CL John



Dimapur, Yimpoksüi/Nov. 07 (TYO): Minister, Forest, Environment & Climate Change, Government of Nagaland, CL John-i Naga nung akhi alemli nungi asaya aruba saisapong wazüka ayutsü aser jenjang tulubai ajungkettsü Hokulbarnü ayongzük, aser asaya aika tanü putui amadokogo ta ashi.

Nagaland Wrestling Association (NWA) tawabangba kübok Chakhesang Wrestling Association (CWA) ajanga ayongzükba 3rd Senior aser 2nd Under 15 Open Naga Traditional Wrestling Championship nung jembidang pai iba o ya ashi.

Naga kin ajunga dang Naga traditional wrestling jenjang tulubai ajungkettsü ayongzükba jembidang, Naga nung indigenous sports jenti liasü, saka mapang süyia aoba ama aika samaogo, ta Minister John-i ashi.

Ajisüaka tang ama sentong balala ajanga Naga wrestling maneni wazüka ayuba atema pela bilemer, ta pai ashi.

NWA, CWA aser melangteper dang pelaba lemsatepdang, state nungi melangteper temi national aser konang bener arutsür, ta ashi. Saisapong ya shibanger malitsüla, saka Angami, Chakhesang aser Zeliang kin

dak alaka danga Naga kingtem danga ajungshitsüla, ta Minister-i ashi.

Sübosolemtsü aser inyakyim aika tanem-tanemi amadokogo, aser Hornbill Festival ama sapangtem ajanga sobaliba maitsü shia arudaksüba nung shilem tajung agir, ta ashi aser melangteper aser lanur saisapongertem dang, konang aser takum alitsü asoshi saisapong nung nukla lir, ta pai ashi.

Iba asayamung nung tetushi tesemdang ama Director, Tourism, Government of Nagaland, Veyielo Duolo-i jembidang melangteper temi shilem agiba, 'non-wrestling communities', talisa Ao aser Lotha kin nungi asayar bhukumba asoshi tenüngsang agütsü aser akhi mapang nungi melangtepa aruba kin alidak kisüing masü saka alema oa Wrestling Associations tentetba atema pelaba lemsatepa liasü.

Sobaliba saisapong ka asünungji, Naga wrestling ya Naga nung ajunga meyong asütsüla aser ibaji ajanga telungjem aser tesendaktep lidaksütsüla, ta pai ashi.

Saisapong maneni temaba jenjangi ajungkettsü atema NWA den teka amteper Tourism Department ajanga January 2026 nungi Wrestling Festival tenzüksü, ta pai sangdonga liasü.

Duolo-i saisapongertem dang temang aser tekolok

shisatsü anema alitsü asoshi anepalutsü ajungshi aser tetoktepa tali akumba ajanga melangtepa ya profession tajung ka akumsü, ta ashi.

3rd Senior aser 2nd Under 15 Open Naga Traditional Wrestling Championship nung nung Thenyizu nungi Venuzo Dawhuo-i takok korang ngutetogo.

Senior category final nung Dawhuo-i Venu Vade-o madak takok ngua liasü.

Dawhuo-i senpet sen 2 lakh angu aser Vade-o nem senpet sen 1.2 lakgh agütsü. Maneni tasembuba jenjang nung Rukukhuto Khushoh nem senpet sen 70,000 agütsü, pezübuba jenjang tongteter Keneiselie Khawakhrie nem senpet sen 50,000 agüja liasü. Quarter finals tongteter Huluyi D Vadeo, Thuputha Hesuh, Krulhuto Venyo, aser Mulusu Veswu nem senpet sen 10,000 agüja liasü.

Under 15 category nung Porba nungi arishi küm 13 tain Kutho Puro-i takok ngua senpet sen 15,000 agütsü.

Tanabuba jenjang tongtetsang Lhiwe Ngachu nem senpet sen 10,000 agütsü, tasembuba jenjang tongtetsang Nehuta Chuzho nem senpet sen 7,000 agütsü. Pezübuba jenjang tongteter Tshu Tetseo nem senpet sen 5,000 agütsü aser quarter finalists Betsho Aruji, Tshete Duolo, Vezhopa Dawhuo aser Munuhu Chuero nung nem senpet sen 2,000 agüja liasü.

Professional football nungi taruba kum anisüngzüksü akok: Sunil Chhetri



Mumbai, Yimpoksüi/Nov. 07 (Agencies): Sunil Chhetri, shiba AFC Asian Cup 2027 indang final round matches asayatsü atema küm tetenzüklen ajungbena meyipa shilanga asaya, pai India nung pa football asayatsü mapang süyioyo ta ashi.

Chhetri ya India nung football asayar tajungtiba rongnung ka ta züngshir, aser pa taoba küm June ita international football nungi anisüngzükba liasü, saka taoba head coach Manolo Marquez-i mepishiba yong pa telemteba melenshia liasü.

India ya iba continental asayamung atema qualify mesütet asünungji, Chhetri-i international football asaya nungi anentsü telemteba agiogo. Iba den külemi arishi küm 42 tain football asayar tejen ya professional football nungia anisüngzüksü akok, ajisüaka ibaji taruba season Indian Super League (ISL) nung Bengaluru FC dak keta lir.

"Onoki ISL nung takok ngura, national (takok anguba) club sentsü agir international competitions nung ano asayatsü maongka agütsütsü. Arishi küm 42 nung temela masü. Tang season nung ni goal 15 agütsür anisüngzükner," ta Chhetri-i osangbener dang ashi.

Taküm August ita India nung tebur football team indang head coach Marquez ya Khalid Jamil-i melenzük. Chhetri-i Jamil nem pa indang telemteba metetdaksüogo aser pa qualifiers atema dang meyipa arua asayar ta ashi.

"Kü telemteba indang Khalid sir dang mela-mela ashi. Ni national team nung adendang, qualifiers nung akok tashi yarutsü kü nükjidadong liasü. Iba dak alaka kecha meliasü. Qualifiers mali asübo ni meyipa marula. Onoki qualify mesütet ta jangjaba sülen ni coach dang ashitsü pela liasü aser pai angatet," ta Chhetri-i ashi.

Chhetri-i ISL nung junga asayatetba yong Marquez-i pa tanaben jaoktsüsa akum. Pai ISL nung goals 14 agütsü, koba Golden Boot angusang Alaaeddine Ajaraie sülen tajungtiba liasü.

Mezüngbo nungnanga liasü saka Chhetri-i mulunga agizük, saka pa meyipa shilanga trokben asayaba nung goal ka dang agütsütet. Pa international career nung goals 95 agütsür anisüngzükner.

"Ni sasaba kecha mali. Onoki sasabaji qualify mesütetba ya dang lir. Ni asaya pezü nung tajungtiba agi asaya."

BENDANGLI OSANG : Tapak 7 nungi...

Pakistan aser Afghanistan ceasefire...

Civilian tem asüba nungi kumzüksü mechi Afghan Taliban-i telangzüba agüja mali, ta Zabiullah Mujahid-i ashi. Tia maka Pakistan sepaitemi ano maneni Kandahar nung aliba Spin Boldak district nung injang khalokja nüburtem tsübodaksü, ta pai ashi.

Taoba mapang linük ana tsüngta jembishinü akaba mapang ceasefire atsülangtsü aser azüdokshi nungi jenbua alitsü züngzüktepa liasü, ta Mujahid-i ashi.

Turkish aser Qatari mediators temi Istanbul nung Afghan aser Pakistani

ketdangsür den senden balala amendang, Pakistan-i Kandahar nung Boldak aser Wesh tesemtem amakba aser Afghanistan-i telangzüba agütsüba osangtem lir, ta Khalilzad-i social media X nung ashi.

Ajisüaka Pakistan-ibo Chaman arütsülen Afghanistan-i mezüing injang khaloktsü tenzük ta ashir aser ceasefire nung aibelenogo ta Afghanistan-i jembiba aitsü.

Sepaitemi shisa kaa inyakba ajanga tensa azioka lir aser ceasefire shidak lir, ta Pakistan-i ashi.

BILEMDANGANG

"Lenir yagi lenmang meteta alir, lenmang nung anir aser lenmang sayur."